

題無上九霄玉清大梵紫微仙都雷霆玉經

武夷張元瑞僑寓仙城積善之家也刊施雷經章釐其句字求其義遺其子著訂訛於余余謂之曰楊柳姮娥之語此雷部隱旨也不可致詰神之毋忽

題張紫陽薛紫賢真人像

昔李亞以金汞刀圭火符之訣傳之鍾離權權以是傳呂巖叟巖叟以是傳之劉海蟾劉傳之張伯端張於難中感杏林石泰之德因以傳之秦邠州人也事成游毗陵授之於蜀僧道光光之門有行者道楠號爲陳泥丸卽先師也偶緣道過太平宮觀壁間張平叔僧道光之像感前賢之已說嗟塵世之不仙思鸞鶴之未來對江山而無味張乃紫陽真人太微第四星也道光姓薛號爲紫賢石公乃翠元先生先師則翠虛真人也海南白玉蟾因訪知宮蔡長卿於是乎書

題周圓通策籙歌

上清靈寶圓通法師周君以寧舊諱大鼎字國寶少游方外歸賦策籙歌四海學者裹糧掘趨戶外滿屢投詞山峙靈通妙應在人耳目公享人間九十壽一從仙去得公法者何啻二三百人甲以告乙乙以傳丙圓通一派幾何人哉惟紫樞林君時中深味淨明之髓以壽圓通之脈又從而續公之歌愚不知策籙所謂恐只於詮圓通之大義也否則龐居士何爲而業於策籙

道藏輯要

白真人集

四

三

婁集四
×川川